

17/08/1997

Tiada tolak ansur tuntutan melampau

Dzulkfley Zanudin; Azmi Md Deros

IPOH: Kerajaan tidak akan bertolak ansur terhadap pendekatan yang kurang bijaksana atau tuntutan melampau dalam isu perlaksanaan syariah di negara ini, kata Timbalan Perdana Menteri, Datuk Seri Anwar Ibrahim.

Sebaliknya, beliau yang juga Timbalan Presiden Umno berkata, kerajaan bersedia untuk ditegur dan menerima pandangan mengenai cara memperkemaskan tindakan dan langkah dalam pelaksanaan syariah.

Menurutnya, keutamaan atau matlamat syariah ialah mewujudkan keselamatan dan pembangunan negara, kesihatan dan perumahan awam seperti digariskan kebanyakan ulama terkenal termasuk Mohd Yusof Qardawi.

Selain itu, kebijaksanaan kepemimpinan Khalifah Umar Abdul Aziz juga perlu dicontohi masyarakat dan pemimpin sekarang bagi mewujudkan keadilan dan keberkesanan pemerintahan negara terutama berhubung isu syariah.

"Cuma yang saya minta dengan rakan-rakan kita, walaupun kurang bersetuju dengan pendekatan kita, jangan menolak seolah-olah kita adalah orang yang menentang syariah atau kita sengaja untuk memperkecil atau meremehkan hukum hudud.

"Dari segi stail pendekatan orang yang menjerit dan melaungkan slogan Islam di banyak negara dengan apa yang kita lakukan setakat ini, kita sudah buktikan keberhasilan dan kejayaan kita lebih berkesan daripada apa yang pernah dicuba di negara lain," katanya pada perasmian Konvensyen Umno Perak di sini, malam tadi.

Hadir sama Menteri Besar, Tan Sri Ramli Ngah Talib yang juga Pengerusi Badan Perhubungan Umno Perak. Lebih 700 perwakilan dari seluruh Perak menyertai konvensyen sehari bermula hari ini.

Selain itu, dua tokoh veteran Umno Perak, Baharuddin Mohd Saman dan Ayesha Hamid Bidin masing-masing dipilih Tokoh Umno Perak 1997 serta menerima anugerah daripada Anwar.

Anwar berkata, persoalan sekarang ialah bagaimana mendidik anak-anak dan menyuntik keyakinan mereka melalui dakwah dan pendidikan untuk membolehkan menilai sesuatu tindakan seperti isu gadis Melayu menyertai pertandingan ratu cantik, baru-baru ini.

"Saya sengaja bawa pandangan ulama Islam mengenai prinsip syariah kerana kerajaan sungguh-sungguh rasa sangsi dan runsing soal ini.

"Saya nampak Presiden kita (Datuk Seri Dr Mahathir Mohamad) bimbang kita tergelincir daripada hasrat kita untuk membangunkan Islam dari pendekatan sederhana dan dapat menarik majoriti umat Islam serta memberi kefahaman kepada bukan Islam," katanya.

(END)